

AKASHVANI AIZAWL
REGIONAL NEWS BULLETIN
HEADLINES (MORNING)

1. Lok Sabha MP Pu Richard Vanlalmangaiha’n nimin khan Union Minister of State for Environment, Forest & Climate Change Pu Kirti Vardhan Singh-a chu kawmin NIT, Mizoram-in Forest Clearance an hmuh theih loh avanga hna thawh theih a nih loh thu a thlen.
2. Gauhati High Court leh Aizawl Judicial District Portfolio Judge, Justice Marli Vankung, Judge chuan nimin khan Mamit District Court a tlawh.
3. Prime Minister Narendra Modia chuan India in European Union leh US nena summdawnna lama inremna thar an siam chuan khawvelin remna kawng a zawh a ni tih rintawkna khawvel mipuite thinlungah a tuh a ti.
4. Sawrkar laipui, Nagaland sawrkar leh Eastern Nagaland People's Organisation chuan Frontier Nagaland Territorial Authority (FNTA) din turin inremna an ziaak.

<><><>

LS MP

Lok Sabha MP Pu Richard Vanlalmangaihan nimin khan Union Minister of State for Environment, Forest & Climate Change Pu Kirti Vardhan Singh-a chu Parliament-a a office-ah a kawm a.

Pu Richard Vanlalmangaiha chuan Union MoS hnenah hian NIT, Mizoram-in Forest Clearance an hmuh theih loh avanga hna thawh theih a nih loh thu a thlen a. Mizoram Sawrkarin tih tur tul zawng zawng a tihfel tawh thu hrilhin, Central Ministry lamin a rang lama tihfelsak turin Minister hi a ngen a. NIT chu Mizoram tana Institution pawimawh tak a ni a, thangthar lo la awm zel turte tan zirna in chhenfakawm tak a nih tur thute a sawi bawk a ni.

Union MoS Pu Kirti Vardhan Singh pawhin a rang lama tihfelsak vat turin hma a lo laksak tur thu a lo hrilh ve bawk a ni.



CM MET DEENCE OFFICERS

Chief Minister Pu Lalduhoma chuan a office-ah Ministry of Defence hnuaia awm; National Defence College-a intuaihriam mek India leh ram dang sipai officer; Mizoram rawn tlawha lo zin mekte nimin khan a kawm a.

Chief Minister chuan, Mizoram chu state ralmuang, ziaik leh chhiar thiam vekna, eirukna tlemna, khualzinten nasa taka an tlawh mek a nih thu a hrilh a. Aizawl chu lirthei tam hle mah se khawpui reh riail mai a ni a, hmeichhia leh naupangte tan pawha khawpui ralmuang tawktak a ni a ti.

Digital Governance lama India rama hmahruaitu nih tuma sorkarin ke a pen mek dan te, Mizoram sorkarin hmathlirte leh hriat duh dang an neihte a hrilh a. An cham chhunga hun nuam tak hmang turin duhsakna a hlan a ni.

Sipai Officer-te hian Mizoram an hmuh dan Chief Minister hnenah sawiin zawhna an neihte an zawt bawktak a. Ram mawitak a nih bakah a ralmuang a, mipuite an nelawm a, Mizoram hian tlawhtu a la ngah deuh deuh dawn a ni, tiin nuam an tih thu an sawi hlawm a ni.

NDC course kal laite hi Brigadier leh Jt. Secretary tlukpui Army, Navy leh Air Force a mi te, India thian tha ram thenkhat atanga rawn kal sipai officer te an ni a. An cham chhungin Mizoram sorkar hotulute an kawm ang a, hmun thenkhat an tlawh bawktak ang.



SERCHHIP CHILD MARRIAGE AWARENESS

Serchhipah kum tlinglova inneih khapna ni 100 chhung inzirtirna hun kalpui mek a ni a.

100 Days Intensive Awareness Campaign on Child Marriage Free Bharat & Legal Awareness cum Training on the Prohibition of Child Marriage Act, 2006 Under Bal Vivah Mukht Bharat Campaign hi nimin khan Serchhipah bul tan a ni a. Women & Child Development District Programme Officer Pi Lalthlamuani Rokhumchuan Sub Hqrs YMA Hall Serchhip ah a hawng a ni.

Hawanna thu sawiin Pi Lalthlamuani chuan India ram hmun dangah kum tlinglo inneihna a hluar hle a, Mizoram ah pawh za-a za an fihlim tawh lo tih sawiin kum tlinglova inneihna hian retheihna, fahrah leh sualna thlengin a tipunlun thei a ni, a ti. Kum tlinglova inneihna hi India sawrkar chuan tihrem tumin nasa takin hma a la mek a, nu leh pa leh khawtlang hruaitute pawhin mawhphurhna kan nei tih hre thar a, a tihlawhlinpuitu ni turin kalkhawm te a sawm a. Hemi chungchang inzirtirna ni 100 chhung neih tur chu tluang taka neih a nih theih nan duhsakna a hlan a ni.

He hunah hian danin kum tlinglo inneihna a khap dan leh hremna dante, Mizoram dan leh tul dangte in zirtir a ni a, POCSO Act chungchang kalkhawmte zirtir an ni bawktak.

Serchhip khawpui chhunga Anganwadi Worker, Serchhip Bazar Presbyterian Kohhran Hmeichhe member te, hmeichhe VC member te leh MHIP te an tel a ni.

<><><>

JUDGE VISIT MAMIT

Gauhati High Court leh Aizawl Judicial District Portfolio Judge, Justice Marli Vankung, Judge chuan nimin khan Mamit District Court a tlawh.

Justice Marli Vankung chuan Mamit district chu district entawntlak a nih thu sawiin dan leh thupek zawmna kawngah mipuiten thu an zawm tha chu lawmawm a ti a, hemi kawnga hma la thatu police chu an fakawm hle a ni, a ti. District court-a an officer leh staff te chu inlungrual taka thawk ho zel turin a chah a, district muanawm neihnaah an pawimawh thu sawiin tha taka hna thawk chhonzawm zel turin a chah bawk a ni.

He hunah hian Mamit Bar Association chuan an hartsatna leh hmalak ngaihna te an thlen a, office building chu endikin mamawh leh hmalakna ngai te sawi ho a ni bawk.

RD Darthanzauva Mamit PTC.

<><><>

ASSEMBLY SESSION

Tun thla ni 17 atanga tan tur Assembly budget session a hun hman dan tur kimchang chu Speaker kaihhruai Business Advisory Committee thukhawm lehin a ngaihtuah tha leh a ni dawn.

Assembly inkhawm hun hman dan tur duangtu, Speaker Pu Lalbiakzama kaihhruai Business Advisory Committee (BAC) nimina thukhawm chuan budget session hun hman dan tur tlangpui an duang a. BAC duan dan chuan Pu Lalduhoma'n a wawi 3-na atan Mizoram budget chu a pharh leh dawn a, a hun tur tak hi tihchian leh tur a ni. Budget session ni March ni 12 thleng awh tura ruahman chhin a ni. Assembly inkhawm tan ni February ni 17 chawhma dar 10 leh a chanve-ah larsap Gen. Vijay Kumar Singh chuan kum khata inkhawm hmasa bera tihdan pangngai-in Assembly House chhungah thu a sawi ang a, sorkar hnathawh tawh leh hmachhawpte a sawi ang. Hemi hnu hian Llarsap thusawi chung a lawmthu sawina motion pulutin a tuk February ni 18-ah sawiho a ni ang.

Tun thlengin sorkar atangin dan dinglai siamthatna tur (amendment bill) 5 a lut tawh a. House chhunga chhan chi zawhna (starred question) 749 leh zawhna ziaka chhan chi 287 a lut tawh bawk a, a la luh belh mek zel bawk a ni. Tun tum Assembly pakuana thutkhawm wawi rukna-ah hian mithi sun tur an awm rih lo niin Assembly Secretariat official-te chuan an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CBI

Indian Air Force (IAF) tana Lengpui ram lei chungchang CBI chhui phutin MNF Legal Board leh Congress Party chuan nimin khan ngenna an thehlut a, Mizoram Lok Ayukta a chhui tir turin thubuai thehluk a ni bawk.

MNF Party chuan nimin khan Chief Secretary Pu Khilli Ram Meena, Chief Vigilance Officer ni bawk hnenah CBI chhuitir tura ngenna an thehlut a, an Vice Chairman Lalpianfela Chawngthu hminga lehkha an thehluk-ah hian MNF Legal Board chuan IAF tana Lengpui rama mimal ram lak danah thil felhlel bakah tun sorkara thuneitu sangte'n pawisa tam tham tak an eiru a puhin CBI chhuitir ngei turin an phut a. Tun sorkar ding lai-in kum 2023 December ni 23 a CBI te a tul ang ang chhui thei tura thuneihna (general consent) a pek chu kum 2024 June ni 27 a a hnukhir leh tak avangin CBI-te koh luh hi an ngen tih an lehkha thehlukah chuan an tarlang a. CBI kher chhui an ngiatna chhan chu he thilah hian Chief Minister, Revenue Minister, sorkar officer lian leh politics a thiltithei mimal engemaw zat an inhnamhnawih ni a puhna a awm avangin Mizoram sorkar hnuai a thawkte chhui mai chi ni lova an ngaih thu an tarlang bawk.

Mizoram Pradesh Congress Committee (MPCC) pawhin nimin vek khan IAF-te hnena Lengpui leh Sihphir ram hralh danah thil fel lo a awma an hriat avangin CBI, Aizawl Unit-ah MPCC Action Committee secretary Pu Lalhmachhuana leh MPCC general secretary Pu C Dothansanga-te hmingin FIR an thehlut a; MPCC chuan ZPM sorkar chu an sawi ang ngeia CBI hnenah general consent pe turin an ngen.

MPCC Treasurer Dr Lalmalsawma Nghaka chuan sorkarin Anti Corruption Branch (ACB)-ah police chhuanawm tak tak a nei reng chungin anni ringzo loa, CBI koh luh a ngai an tihnaah hian Home Minister-in a enkawl Home department chungah rinna an nghat zo lo em ni, an ti a; Mizoram sorkar hian a duh a nih chuan ACB kaltlangin heng ram lei leh hralhna a sulsutu bera ngaih Henry Lalremsanga Hlawnmual man tang eitute chu a chhui chhuak thei tih an tarlang.

Nilaini khan Durtlanga cheng Pu Vanlalruata Sailo chuan Lengpui ram hralh chungchang hi chhui turin Mizoram Lok Ayukta ah nimin khan ngenna a thehlut a,

Lok Ayukta chuan lo pawmsakin, Inquiry Team hnuaiah Preliminary Inquiry ti tura hmalak nghal ni a thudawn a ni.

<><><>

MOTION OF THANKS TO PRESIDENT’S ADDRESS

Prime Minister Narendra Modia chuan India in European Union leh US nena summdawnna lama inremna thar an siam chuan remna kawng a zawh a ni tih rintawkna khawvel mipuite thinlungah a tuh a ti. Nimina President thusawi chungchanga motion of Thanks sawihona Rajya Sabha-a neihah he thu hi sawiin Pu Modia chuan ram in hmalam hun thui tak daih tur sumdawnnaa inremna a khawvel ram liandangte nen an ziaak tih sawiin hei hian India hmasawnna khawvel hmuhah a tilang a ti a. Thalaite tan remchanna zau zawk a siam dawn a ni a ti bawk. Pu Modia chuan India chu khawvel intihsiaakna dawhsana ding ve turin a inpuahchah tha tawh tawh tih sawiin tunah hian khawvela economy lian pathumna a ni tawh a. Mahni inrintawkna nen thutlukna huaisen tak tak a siam tawh a ti a. Sawrkar chuan hmathlir innghahna pathum insiamthatna reform, hnathawh that perform leh insiamdanglamna transform nen hmalam a pan tih a sawi bawk a ni. PM Modia thusawi zawh hian Rajya Sabha chuan Motion of thanks hi an pawm a ni.

Puan tawh angina Lok Sabha chuan Voice Vote hmangin President in Parliament-a a thusawi chungchanga lawmthu sawina motion an pass a. President Murmu-i hian thla hmasa ni 28 khan Parliament in hniha member thukhawm hmaah thu a sawi a. Motion of Thanks hi Union Minister leh BJP MP Sarbananda Sonowal chuan house ah a pulut a. BJP MP Tejasvi Surya chuan a thlawp zui a ni.

Motion sawiho leh anih hian Opposition lamin house chhungah nasa takin bengchheng an siam a ni.Bengchheng karah hian President thusawi chungchanga lawmthu sawina motion hi pawm a ni ta a ni.

<><><>

NAGALAND

Sawrkar laipui, Nagaland sawrkar leh Eastern Nagaland People's Organisation chuan Frontier Nagaland Territorial Authority (FNTA) din turin inremna an ziaak a. He inremna hi Union Home Minster Amit Shah hriatpuinain New Delhi ah ziah a ni a. Nagaland Chief Minister Neiphiu Rio pawh a tel a. Thusawiin Pu Shaha chuan Nagaland mipuite tana ni chhinchhiahtlak tak anih thu a sawi a ni.

<><><>